



Bilten

mjesečni

omladinska mreža bosne i hercegovine

juni
lipanj
2018.

229

Dragi prijatelji/ce,

Predstavljamo vam junijsko izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **184** organizacije i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

www.omladina-bih.net



SADRŽAJ

Aktivnosti u junu 2018.....	2
Planovi za juli 2018.	6
Aktivnosti članova mreže	7
Saopštenja/informacije/donatori/pozivi.....	20

Uživajte u čitanju!

AKTIVNOSTI ORC/HCA U JUNU 2018.

„Mladi protiv nasilnog ekstremizma“



U okviru partnerskog projekta „Mladi protiv nasilnog ekstremizma“, koji realizujemo u saradnji sa „Proni Centrom za omladinski razvoj“ iz Brčko Distrikta i „PAX for peace“ iz Utrehta - Nizozemska, u Sarajevu je, u Parlamentarnoj skupštini BiH, 12. juna održana konferencija „Mladi protiv nasilnog ekstremizma“.

Konferencija je organizovana u saradnji sa Ministarstvom Civilnih Poslova BiH, a prisustvovalo joj je preko 80 učesnika iz BiH, Srbije, Crne Gore, Hrvatske, Holandije, Portugala, SAD i predstavnika ministarstava, međunarodnih organizacija, omladinskih organizacija, medija i aktivista koji su se odazvali i

aktivno učestvovali u radu konferencije.

Neki od ciljeva konferencije bili su – informiranje mladih iz BiH o važnosti suzbijanja govora mržnje na internetu, širenje svijesti o značaju upoznavanja, saradnje i međusobnog uvažavanja, te pomoć mladima u multietničkim sredinama, kao i povezivanje mladih aktivista za ljudska prava da mapiraju govor mržnje na internetu i razviju instrumente s konstruktivnim odgovorima. Na konferenciji su podijeljena međunarodna iskustva u prevenciji nasilnog ekstremizma, kao i o regionalnim i BiH iskustvima. Prezentovana su dva istraživanja o stavovima mladih u BiH i Hrvatskoj.



Istraživanje: Savremeni mladi u bosanskohercegovačkom društvu: izazovi i stavovi po pitanju radikalizacije i ekstremizma

Na konferenciji „Mladi protiv nasilnog ekstremizma“ koju je realizovao PRONI Centar za omladinski razvoj uz saradnju sa Ministarstvom Civilnih Poslova BiH, Omladinskim resursnim centrom (ORC) Tuzla i Nizozemskom mirovnom organizacijom „PAX“, predstavljeno je i istraživanje rađeno tokom ove godine.

Upitnike za potrebe ovog istraživanja razvio je istraživač Adnan Pečković, u saradnji sa PRONI Centrom za omladinski razvoj. Uzorak su bili mladi ljudi iz preko 60 bosanskohercegovačkih opština koji pripadaju generalnoj populaciji mladih od 15 do 30 godina starosti. Čitavo istraživanje možete skinuti sa linka:

<https://drive.google.com/file/d/1K4gXPRdTbi3uNrVFnSzYWFw1KwHaKm0m/view>

Ovaj projekat je podržan od Ambasade Kraljevine Nizozemske u BiH. Opći cilj projekta je pružiti podršku i povećati učešće mladih u aktivnostima koje imaju za cilj sprečavanje nasilnog ekstremizma, tako što će

dati prioritet značajnim mehanizmima angažiranja na lokalnom i nacionalnom nivou, kako je navedeno u rezolucijama UN 2178 i 2250, te pružiti fizički, socijalno i emocionalno sigurno i poticajno okruženje za učešće mladih u sprječavanju nasilnog ekstremizma građanina/gradžanstva

Više o projektu, kao i dosadašnjim aktivnostima možete pronaći na linku: www.nenasilno.ba.

Projekat je podržan od strane holandske ambasade u Sarajevu kroz MATRA program.

Youth work in progres – trening Vlasenica



U Vlasenici je od 25. maja do 2. juna održan međunarodni trening seminar za razvijanje mentorskih kompetencija omladinskih radnika pod nazivom „Youth Pathways“. Trening seminar „Youth Pathways“ je okupio mlade aktiviste i omladinske radnike iz Grčke, Turske, Litvanije, Hrvatske, Slovenije, Italije, Bosne i Hercegovine, Srbije, Crne Gore, Albanije i Sjeverne Makedonije.

Cilj treninga, koji se realizuje pod pokroviteljstvom Evropske Komisije kroz program Erasmus+, je jačanje kapaciteta omladinskih radnika u osnovnim kompetencijama za mentorstvo da efikasno rade sa mladima online i offline, kao i da na dugoročan sistemski i održiv način osiguraju njihov lični i profesionalni razvoj, blagostanje, cjeloživotno učenje, osnaživanje i aktivno učešće.



Trening seminar „Youth Pathways“ je realizovan u sklopu projekta „Youth Work in Progress“. Organizator seminara i projektni lider je SEEYN mreža.

Predstavnik Omladinskog resursnog centra Tuzla bio je Emir Karamujić.

Omladinska grupa ORC Tuzla

Akcija čišćenja Sonog trga u Tuzli

U subotu, 23. Juna članovi Omladinske grupe Omladinskog resursnog centra Tuzla su odlučili svoj noćni izlazak pretvoriti u akciju čišćenja Sonog trga.



Sonog trg je mjesto gdje se generacijama do sad okupljaju mladi. Međutim grad Tuzla se susreće sa problemom mladih koji ostavljaju velike količine smeća na javnoj površini.

Budi promjena koju želiš da vidiš u svojoj zajednici!

Youth trail 2018.



U Tirani je od 20. do 24. juna održan regionalni samit mladih, pod nazivom „Youth Trail 2018“. Misija OSCE-a u Albaniji organizuje drugo izdanje regionalnog omladinskog samita, pod okriljem predsjedavajućeg italijanskog OSCE-a, u saradnji sa opštinom Tirana i Regionalnom kancelarijom za saradnju mladih (RYCO) sa sjedištem u Albaniji. Događaj okuplja oko 30 mladih ljudi sa Zapadnog Balkana u Tirani, koji ima za cilj razmjenu iskustva, promovisanje zajedničkih akcija na lokalnom i regionalnom nivou i unaprijeđivanje duha saradnje mladih u regionu. Paneli i sesije na samitu su bili posvećeni promovisanju vrijednosti

OSCE-a među mladima. Na sesijama i panelima se razgovaralo o mladima u svijetu OSCE-a, mladima i borbi protiv trgovine ljudima, kulturnom naslijeđu, ravnopravnosti polova, mladima i sigurnosti, djelovanju protiv korupcije, medijima na balkanu, prošlosti, kao i o međukulturnom dijalogu.

Otvorenju događaja su prisustvovali Ambasador Bernd Borchardt - Čelnik OSCE-a u Albaniji, Nj.E. Ditmir Bushati - Ministar evropskih i vanjskih poslova, Ambasador Alberto Cutillo - Ambasada Italije u Tirani, Đuro Blanuša - Generalni sekretar RYCO i drugi visoki zvaničnici.

Predstavnik Omladinskog resursnog centra Tuzla bio je Emir Karamujić.

Uči, misli i djeluj (UMiD)

Uči, misli i djeluj (UMiD) je jednogodišnja obuka koju organizuje Institut za razvoj mladih KULT, Sarajevo. U periodu od 22. do 24. juna 2018. godine, održan je peti, od ukupno deset modula. Modulu su prosustvovali članovi Omladinske grupe ORC-a Samira Aličić, Merima Čokić i Mario Mrkić. UMiD je obuka koja polaznicima nudi mogućnost da steknu samopouzdanje, sagledaju svoje sposobnosti i potencijale, te razviju osjećaj za odgovornost u društvu i steknu vještine timskog rada i liderstva. Obuka je zvanično priznati vid neformalnog obrazovanja, koje mladima pruža mogućnost stjecanja različitih kompetencija, koje će ih učiniti konkurentnima na tržištu rada, a program se sastoji od seminara, praktičnih vježbi i volonterskog rada. UMiD je namijenjen mladim ljudima od 15-30 godina. Omogućava da mladi postanu aktivni lideri u svojoj lokalnoj zajednici i pomognu u rješavanju problema mladih, upoznaju nove prijatelje, nauče nove vještine, druže se i usavrše sebe. Tema petog modula je "Lobiranje i javno zagovaranje".



Trening o javnom zagovaranju i lobiranju je mladima pružio osnovnu teoriju o javnom zagovaranju i lobiranju, te ih ohrabrio da i sami razmisle o kreiranju vlastitih javno-zagovaračkih kampanja na području lokalne zajednice i šire. Spoznali su kako odrediti problem, kome i kako ga adresirati, kako dobiti podršku, te kako uspješno promovirati javno-zagovaračku kampanju na javnim nastupima.

„Mir i pomirenje“

29.juna je u Tuzli održan susret u vidu fokus grupe, na kojem se vodila diskusija o konkretnim koracima pomirenja i obrazovanju. Voditeljica ove fokus grupe bila je Zorica Kuburić prof. Nastave sociologije i



sociologije religije na filozofskom fakultetu u Novom Sadu i predsjednica Centra za empirijska istraživanja religije. Učešće je uzelo trinaestero mladih iz različitih oblasti, a među njima su bili i članovi Omladinske grupe Omladinskog resursnog centra Tuzla, Benjamin Burek i Duško Majkić. Susret je održan od 10:00-11:30h u prostorijama MIOS-a, a cilj ovog susreta je bilo fokusiranje na praktične korake pomirenja u obrazovanju.

REDOVNE AKTIVNOSTI ORC I HCA TUZLA

Tokom juna radili smo na održavanju i razvoju komunikacija i koordinacije unutar Omladinske mreže Bosne i Hercegovine (www.omladina-bih.net). U okviru toga smo svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte.

PLANOVI HCA/ORC-A ZA JULI 2018.

- Početak implementacije projekta „CAT 18“. U okviru ovog projekta u naredom periodu naše aktivnosti su: Izrada WEB stranice, fb stranice, 3 onground treninga i jedan online trening.
- Kolektivni godišnji odmor ORC Tuzla

Svim čitaocima našeg mjesečnog biltena želimo da ugodno provedu ljetne praznike, a studentima mnogo sreće i pozitivnih ocjena na ispitnim rokovima!



AKTIVNOSTI ČLANICA OMLADINSKE MREŽE BiH



Udruženje studenata medicine u BiH
BoHeMSA LC Tuzla

Univerzitetska 1, 75000 Tuzla
Tel. +387 61 820 292
E-mail: bohemsa.lctuzla@gmail.com
President.tuzla@bohemsa.org

Klinička praksa

Udruženje studenata medicine u Bosni i Hercegovini „BoHeMSA“, ured Tuzla redovno održava svoj projekat „Kliničke prakse“. Projekat se sprovodi u okviru Komiteta za medicinsku edukaciju (SCOME), na čelu sa lokalnom oficirkom Elmirom Begić.



"Klinička praksa" je projekat koji je i ove godine trajao mjesec dana u periodu maj-juni akademske 2017/18 godine, a aktivno učešće je uzelo pedeset studenata/ica od 3. do 6. godine Medicinskog fakulteta Univerziteta u Tuzli. Cilj projekta je bio upoznati studente/ice sa praktičnim radom na klinici, poput vađenja krvi i parenteralnom primjenom lijekova odnosno segmentima praktičnog rada i medicinskih vještinama.

S obzirom na manjak praktičnog znanja koje se obrađuje u okviru redovnog nastavnog kurikuluma, ovaj projekat je poslužio kao dopuna već postojećeg teorijskog znanja sa vještinama kojima treba raspolagati svaki medicinski profesionalac.

Važno je napomenuti da je ovo drugi projekat Udruženja koji je ove godine licenciran i prihvaćen u program Internacionalne Federacije Studenata Medicine (IFMSA).



Institut za
razvoj mladih KULT



Ul. 4. Viteške brigade
34 – 36 BA, 71210 Ilidža,
Sarajevo
Tel: +387 33 778 778.
Fax: +387 33 778 79
E-mail: kult@mladi.org,
web: www.mladi.org

Kafa sa kandidatima/kinjama za Predsjedništvo BiH: Samo konkretni potezi ispuniti će očekivanja mladih u BiH

Rješenje političke krize u Bosni i Hercegovini jedino je moguće ukoliko se naprave korjenite promjene unutar stranaka koje su na vlasti posljednjih 20 godina, ili ako ponudimo potpuno nove politike, trećeg rješenja nema.“ – poručio je Boriša Falatar, kandidat Naše stranke za člana Predsjedništva BiH na Kafi sa mladima iz BiH.



Kafi sa kandidatom za člana Predsjedništva BiH prisustvovali su mladi iz svih dijelova Bosne i Hercegovine, a zanimale su ih vizije koje ovaj kandidat nudi u oblasti vanjske politike BiH, sektoru obrazovanja, zaustavljanju odlaska mladih iz zemlje, ali i brojnih drugih oblasti u kojima se ova populacija susreće sa određenim problemima.

„Ovakvi događaji potrebni su mladima u BiH. Bilo bi odlično da slična dešavanja budu organizovana i u drugim gradovima i dijelovima zemlje, jer se susreću sa brojnim problemima, i potrebno im je da vide da neko brine i o njihovim potrebama.“ Poručio je učesnik koji je na „Kafu sa...“ kandidatom za člana Predsjedništva BiH došao iz Čelince.

Mladi su istakli i kako od budućih predstavnika očekuju samo konkretne poteze i da neće pristajati na manje od toga jer je zasićenost dosadašnjom politikom dosegla vrhunac.

U cilju da podrži razumijevanje mladih u izbornom procesu za Predsjedništvo BiH, Institut za razvoj mladih KULT od juna do oktobra 2018. godine organizovat će susrete mladih ljudi sa kandidatima/kinjama za Predsjedništvo BiH.

U Bosni i Hercegovini živi oko 700.000 mladih, koji su zakonima o mladima definisani kao osobe dobi od 15 do 30 godina. Većina mladih ima pravo glasa, a Institut za razvoj mladih KULT na ovaj način im želi dati priliku da budu birači, a ne glasači, jer pitanja mladih trebaju i moraju biti dio programa političkih stranaka u BiH, te da je krajnje vrijeme da najviši nivo vlasti u svoj diskurs stavi mlade kao primarni fokus.

Program „Kafa sa...predsjedničkim kandidatom/kinjom“ bit će organizovan u Sarajevu, a za prisustvo događaju na web stranici Instituta mogu se prijaviti mladi iz cijele BiH do 35 godina starosti, koji žele biti dio konstruktivnog dijaloga o potrebama i izazovima sa kojima se ova populacija suočava.

Mladi mogu i trebaju lobirati

Kako lobirati i javno zagovarati učili su polaznici/e 13. generacije obuke „Uči, misli i djeluj!“ u okviru petog modula.

Tokom modula, polaznici/e su se upoznali s vrstama i nivoima vlasti, budući da je u javno-zagovaračkom procesu značajno poznavati nadležnosti institucija i poštovati te nadležnosti. Također, polaznici/e su upoznati s osnovama javnog zagovaranja i lobiranja, a kroz interakciju stekli su vještine za zagovaranje i lobiranje kako za svoje lokalne građanske inicijative koje će provoditi u narednom periodu, tako i za naredne zagovaračke inicijative koje će doći od njih, s ciljem unaprjeđenja stanja u društvu.

Vještine javnog zagovaranja kao temelja građanskog aktivizma jako su značajne za mlade aktiviste/kinje kako bi mogli zagovarati i lobirati za inicijative koje će doći od njih samih, a koji mogu zagovarati za unaprjeđenje položaja mladih u društvu. Grupa je posjetila i centralni ured Instituta za razvoj mladih KULT, te se upoznala s uposlenicima/ama Instituta, njegovim odjelima i načinom rada.

Polaznicima/ama je posebno inspirativna bila „Kafa sa...Draškom Stanivukovićem“, odbornikom u Skupštini Grada Banja Luke, koji i sam zagovara za unaprjeđenje određenih pitanja u svojoj zajednici. Inspirativan je bio Draškov govor, kao i savjeti za uspjeh koje je podijelio s mladim ljudima, posebno savjet da uvijek u sebi traže s čim oni mogu doprinijeti društvu.

Posljednji dan modula o javnom zagovaranju i lobiranju, polaznici/e su iskoristili da nauče više o javnom aspektu javnog zagovaranja, te o načinu na koji trebaju kreirati svoje poruke o zagovaračkim inicijativama za javnost, te kako ih što bolje predstaviti javnosti.

Modul je održan u Obrazovno-raznodnom centru za mlade SPAJALICA, a okupio je 25 mladih osoba iz cijele Bosne i Hercegovine.



Aktivni mladi - korak naprijed ka zajedničkim promjenama



Mladi moraju dobiti priliku da pokreću promjene u svojim zajednicama, mišljenja su učesnici/ce inicijative Aktivni mladi – korak naprijed ka zajedničkim promjenama. Moraju razumjeti i štititi svoja prava i preuzimati glavne uloge u životu zajednice, a koja će njima i nama omogućiti da oblikujemo svoje okruženje u skladu s vlastitim potrebama.

Aktivizam mladih je ključni koncept za zagovaranje promjene koju želimo vidjeti i jako je važno da kreativnost, inspiracija i aktivno učešće mladih u svim aspektima života bude ono što oblikuje zajednicu i svijet u skladu sa željenim standardima i potrebama.

Ako želimo potaknuti promjene u našim zajednicama i unaprijediti naše okruženje, moramo poticati lokalni aktivizam mladih. Moramo pronalaziti inovativne metode koje će u naš svakodnevni život vratiti kreativnost i energiju mladih.

Prepoznale su to organizacije iz Srbije, Bosne i Hercegovine, Crne Gore i Slovačke koje implementiraju inicijativu Aktivni mladi – korak naprijed ka zajedničkim promjenama.

U okviru inicijative u Beogradu je od 6. do 10. juna 2018. godine održan trening za grupu mladih iz Srbije, BiH, Crne Gore, Slovačke, Kosova*, Hrvatske, Makedonije, Grčke i Albanije.

Cilj je bio pomoći učesnicima da jačaju učešće i aktivizam mladih i prilagode ga trenutnoj dinamici i novim okolnostima u njihovim zajednicama.

„Tokom treninga sam naučila mnogo i upoznala odlične ljude. Treneri i cijeli tim je vrlo su pristupačni i vrlo sam motivirana da radim nešto u svojoj zemlji. Jedva čekam da počnem raditi na nečemu u Albaniji.“ – Eldijona Shukallari, Tirana Albanija.

Mladi i omladinski radnici u dobi između 24 i 35 godina su kroz trening istraživali različite pristupe za rješavanje lokalnih problema mladih u svim zemljama u kojima se inicijativa realizuje. Istovremeno, trening je poslužio i kao platforma za pronalazak zajedničkih tema i problema na kojima mladi mogu zajedno raditi, te djelovati u svojim lokalnim zajednicama.

„Trening je za mene bio kreativan, potakao me na razmišljanje kako imati utjecaj u zajednici u kojoj živimo. Osjetila sam sam da nisam sama i da ima još mladih koji mi mogu pomoći. Trening mi je bio vrlo inspirativan i pokazao mi je da se neke stvari u regiji mogu rješavati zajedničkim naporima.“ – istakla je Zana Sulajdžić, Travnik BiH.

Nakon treninga mladi iz svih zemlja učesnica radit će na lokalnim inicijativama kako bi testirali različite pristupe u rješavanju problema mladih, što će biti prikazano i kroz publikaciju.

Dio inicijative koju podržava Europska fondacija za mlade Vijeća Europe je i Institut za razvoj mladih KULT.

Aktivizam na djelu

Visoko je u junu bilo mjesto susreta i aktivizma. Prvi Omladinsko-aktivistički festival „Kriv(a) sam“ koji je u ovom gradu održan od 20. do 24. juna 2018. godine ponudio je zanimljive aktivnosti koje su za cilj imale probuditi aktivizam kod mladih ljudi.

U okviru festivala organizovane su ulične akcije, koncerti, edukativne radionice kojim su dominirale mlade snage.



Tokom trajanja festivala mladi su imali priliku učiti o važnosti učešća mladih u procesima donošenja odluka, razgovarati sa općinskim, kantonalnim i federalnim vijećnicima, zastupnicima o položaju mladih u Visokom i Bosni i Hercegovini, ali se i kreativno izražavati preko literarne i likovne radionice.

Učešće na kreativnim radionicama bilo je i prilika da mladi pošalju poruku političarima kroz izložbu radova u jednoj od najprometnijih ulica u gradu.

Omladinsko-aktivistički festival „Kriv(a) sam“ organizovala je nevladine organizacije Mladi volonteri iz Visokog uz finansijsku podršku Instituta za razvoj mladih KULT, te Ministarstva za obrazovanje, nauku, kulturu i sport ZDK.



OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH
Tel./Fax: +387 49 211 032
E-mail: svitac@gmail.net
Web: www.svitac.org
FB: www.facebook.com/omladinska.svitac

Dnevne radionice



Omladinska organizacija Svitar je u junu nastavila sa svakodnevnim aktivnostima. Učesnici su podijeljeni u dvije grupe, uzrast 4-7 godina svakim danom od 11:00-13:00, a uzrast 8+ od 14:00-15:30 časova. Mlađi učesnici su pravili razne ekološke, edukativne i maštovite stvari uz pomoć lokalnih i međunarodnih volontera. Kreacije su ovaj mjesec rađene na razne teme, a neke od tih kreacija su: hobotnice od papira u 3D formatu, kenguri, zečevi i mačke. Teme su rađene uz pomoć maštovitih radnih listova sa ciljem usvajanja novog vokabulara. Učesnici su nastavili učenje azbuke, nakon završene abecede, te sabiranje i oduzimanje. Na muzičkim radionicama su vježbali pjesmicu „Žalile se žabice“, kako bi se ukazalo na ugroženost životne sredine. Učesnici su takođe imali priliku učiti osnove iz engleskog na temu „dijelovi tijela“, uz pomoć malih

kartonskih lutkica. Ovaj mjesec Svitar je u gostima imao i drugare iz organizacije „Malac genijalac“, koji su uz pomoć velikog abakusa pokazali najmlađima metodu jednostavnog sabiranja i oduzimanja.

Materijal korišten na radionicama je karton u boji, kolaž papir, drvene i masne bojice, makaze, ljepilo, šljokice, drveni štapići, dekorativni i ukrasni papir, plastelin, vuna. Drugi dio radionice je namijenjen za relaksaciju, osvježanje, jogu, sportske i razne takmičarske igre. Cilj ovih aktivnosti kao i do sada je da djeca razviju maštu i da koristeći razne materijale izraze svoju kreativnost, te da razviju motoriku, osjećaj tolerancije i poštovanje prema drugima i usvoje lijepo ponašanje.

Učesnici druge radionice (14:00-15:30), za uzrast 8+, su vrijedno učestvovali u raznim aktivnostima. Ponedjeljom je kreativno izražavanje na kojima su učesnici pravili razne kreacije na temu Ekologija i zaštita životne sredine, koristeći razne materijale. Neke od tih kreacija su: Kasica Prasica, cegeri od pamučnog materijala, okviri za slike od materijala koji se mogu reciklirati. Utorkom su učesnici vježbali engleski jezik i svakodnevnu komunikaciju, te razne igre koje poboljšavaju učenje engleskog u grupi i timski rad. Ovaj mjesec su učili o emocijama i izražavanju osjećaja na engleskom jeziku. Srijedom su učesnici ponavljali turski alfabet i osnove kako se predstaviti, te nazive voća, četvrtkom su se družili uz sportske aktivnosti, gdje su naučili pravila za ragbi, a petkom su, na radionicama njemačkog jezika, obradili temu ekologija i zaštita životne sredine. Cilj i ovih aktivnosti je da učesnici razviju maštu i da koristeći razne materijale izraze svoju kreativnost, razviju motoriku, osjećaj tolerancije, poštovanje prema drugima i usvoje lijepo ponašanje. Koordinator radionica u junu je bio Adin Midžić uz asistenciju lokalnih, Weltwaerts, ERASMUS+, Love Volunteers i Omprakash međunarodnih volontera. Sve aktivnosti se održavaju u Omladinskom centru Brčko distrikta.

„Pričamo njemački“- radionice komunikacije na njemačkom jeziku sa izvornim govornicima

Radionice njemačkog jezika se održavaju dva puta u sedmici u prostorijama Omladinskog centra Brčko distrikta. Radionice se održavaju u sledećim terminima: četvrtkom - za početnike A1 nivo (16:30-17:30), za A2 level (17:30-18:30), te za B1/B2 (18:30-19:30). Radionice komunikacije na njemačkom jeziku su namijenjene svima koji žele naučiti osnove gramatike i usavršiti već postojeće znanje i steći nova iskustva i poznanstva. A1 grupa je ovaj mjesec radila zanimanje – Njegovatelj/ica, putovanja i dijelovi tijela. A2 je radila temu Zološki vrt – argumenti za i protiv, te slične teme kao i grupa A1, ali uz kompleksnije fraze, dok je napredna grupa B2 obrađivala gramatičke tempore Futur I i II, Imperfekt i Perfekt, te pisanje CV-a i diskusiju na temu politika u Njemačkoj. Koordinator projekta su međunarodne volonterke iz Njemačke.

Radionice gitare

Učesnici ove radionice su nastavili uvježbavati nove duete, etide i kompozicije I.Albeniza, F.Sora, M.Carcassija, Rolanda Dyensa, Thierry Tisseranda, F. Tarrege i Lea Brouwera, kao i nekoliko novih pop pjesama po vlastitom izboru („About a girl“, „Scar tissue“, „Man who sold the world“).

Dio vremena na nekim od radionica bio je posvećen upoznavaju učesnika sa modovima durske skale i korištenju istih u improvizaciji i komponovanju kraćih tema.

Radionice sambe

Učesnici ove radionice nastavili su rad na sopstvenim kompozicijama „Third thought“, „Beyond“ i „Perodactyl“. Takođe su svirali i kompozicije u kojima nisu korištene električne gitare: „Xango“, „Sirens“ i „Hedgehog“.

Međunarodni dan roditelja

Međunarodni dan roditelja se obilježava 1. juna u čast roditelja i njihove ljubavi i posvećenosti djeci. Ovaj datum ustanovila je Generalna skupština Ujedinjenih naroda 2012. godine.

Omladinska organizacija Svitac je, zajedno sa međunarodnim i lokalnim volonterima, realizovala radionicu sa drugarima uzrasta 4-7 godina. Učesnici se pravili čestitike za svoje roditelje, te su učili riječi iz engleskog jezika na temu roditelji i frazu „ I love my parents“, koju su napisali na čestitki. U drugom dijelu radionice su pravili lutke od kartona koje su predstavljale roditelje, te su ih ukrašavali.

Na poslepodnevnoj radionici je takođe obilježen „Međunarodni dan roditelja“ za učesnike uzrasta 8+. Učesnici su naučili na njemačkom jeziku kako da kažu roditelji, otac, mama, porodica i ostale riječi, koje se vežu uz ovaj vokabular. U drugom dijelu su održane sportske takmičarske igre, za jačanje timskog duha. Radionice su održane u Omladinskom centru Brčko distrikta BiH.

Eco projekat

Omladinska organizacija Svitac je, zajedno sa članovima ASUBiH Lokalnog tima Brčko, u maju započela pripreme, aktivnosti i rad na zajedničkom Eco projektu. U četvrtak, 31.05. realizirane su prve, ali ne i jedine aktivnosti.

U vremenskom periodu od 11.00 do 14.00 časova, učesnici projekta su se nalazili na Trgu mladih Brčkog, te pritom promovisali važnost čiste životne sredine, obrazlagali cilj projekta, te uradili mali kviz sa prolaznicima gdje su se uvjerali da je dosta ljudi zabrinuto trenutnim stanjem okoliša, te da nisu svi toliko upoznati sa trenutnim stanjem. Prilikom ulične aktivnosti dijelili su i letke za filmsko veče, koje se održalo istog dana u 19:30 i prostorijama Omladinskog centra. Prisutni su imali priliku pogledati



dokumentarni film, naučiti nešto novo, razgovarati sa drugima i zajedno biti dio male, ali promjene na bolje!

Zaštita životne sredine je veoma važna tema. Ovaj projekat će omogućiti mladima da razviju i realizuju svoje ideje o životnoj sredini i njenoj zaštiti, a takođe im treba pružiti priliku da se upoznaju sa drugima istih interesovanja, kako bi imali mogućnost aktivno raditi na realizaciji svojih ideja.

Svjetski dan zaštite okoliša

Već punih 40 godina 5. juni se obilježava kao Svjetski dan zaštite okoliša, čiji je glavni cilj podizanje svijesti o važnosti zaštite okoliša. Ovaj datum pada na godišnjicu održavanja Konferencije Ujedinjenih naroda u Stockholmu 1972. godine posvećene okolišu, na kojoj je usvojen i Program zaštite okoliša UN-a. Na Konferenciji je naglašena potreba stvaranja ravnoteže između potreba čovječanstva i ograničenih mogućnosti koje planeta može pružiti.

Omladinska organizacija Svitac je na ovu temu zajedno sa međunarodnim i lokalnim volonterima organizovala radionicu za učesnike od 4-7 godina. Učesnici su koristili radne listove, te spajali tačkice, kako bi dobili sliku leptira u kojem se nalazi čista priroda. Takođe je snimljen i kratki video zapis, gdje učesnici pjevaju "Žalile se žabice".



Svjetski dan zaštite okoliša je obilježen i sa sa popodnevnom grupom. Učesnici su imali priliku pogledati dva kratka videa na temu zaštite okoliša, te su zajedno sa lokalnim i međunarodnim volonterima zasadili biljku, koja će se od sada nalaziti u našoj radnoj prostoriji. U trećem dijelu radionice su pravili pamučne cegere, kako bi skrenuli pažnju na prekomjerno korištenje plastičnih vrećica. Radionice su održana u Omladinskom centru Brčko distrikta BiH.

Svjetski dan protiv iskorištavanja djece za rad

Svjetski dan borbe protiv iskorištavanja djece za rad obilježava se 12. juna svake godine. Prvi put je obilježen 2002. godine u organizaciji Međunarodne organizacije rada (ILO) s ciljem podizanja svijesti i pokretanja akcija u svijetu protiv dječijeg rada.

Svitac je zajedno sa međunarodnim i lokalnim volonterima realizovao radionicu sa drugarima uzrasta 4-7 godina i 8+. Učesnici uzrasta 4-7 godina su sa koordinatorom radionice razgovarali na temu –Dječiji rad/Dječija prava- prilagođenu njihovom uzrastu, te su crtali sebe i svoje drugare na velikom posteru kako se bezbrižno igraju, na temu „Bezbrizno djetinjstvo“.

Na poslepodnevnoj radionici učesnici su pogledali nekoliko kratkih videa, prilagođenih njihovom uzrastu na aktuelnu temu, te su nakon toga učestvovali u diskusiji. Na kraju radionice su igrali „Socijalni monopol“, u kojem su imali određena pravila za kretanje, prilagođeno određenom pravu djeteta.

Međunarodni dan izbjeglica

Omladinska organizacija Svitac je obilježila ovaj dan sa učesnicima uzrasta 4-7 i 8+. Učesnici uzrasta 4-7 godina su čitali priču, koju je napisao dnevni koordinator, prilagođenu temi dana i uzrastu učesnika – Međunarodni dan izbjeglica. Nakon toga su diskutovali na ovu temu, te su zaključili, da sva djeca u svijetu trebaju imati svoj dom i da niko nema pravo da ih protjera.

Na poslepodnevnoj radionici je Dnevni koordinator, zajedno sa međunarodnim i lokalnim volonterima, osmislio pozorišni komad, gdje su učesnici imali interaktivno učešće. Na kraju radionice su učesnici napisali svoje misli, želje i poruke svoj raseljenoj djeci svijeta.


Svjetski dan kulturne raznolikosti za dijalog i razvoj

U novembru 2001. godine Generalna skupština UNESCO-a je usvojila Univerzalnu deklaraciju o kulturnoj raznolikosti, te proglasila 21. maj Svjetskim danom kulturne raznolikosti za dijalog i razvoj. Kultura obuhvaća sveobuhvatni način života, opšti sistem vrijednosti, tradicije, umjetnosti, vjerovanja. Na ovaj dan daje se prilika za proširenje spoznaje o vrijednosti kulturnih različitosti i poticanje na život u miru, dijalogu i otvorenosti.



Omladinska organizacija Svitac je na ovu temu zajedno sa međunarodnim i lokalnim volonterima organizovala radionicu za učesnike od 4-7 godina. Učesnici su koristili vodene boje i tempere kako bi ostavili trag ruke na papiru. Od ovih crteža je napravljen lanac od papira kao simbol zajedništva. Prva grupa je takođe ostavila print svojih ruku na hamer papiru, koje je poslepodnevna grupa obojila i ispisala porukama mira i zajedništva, te ukasila. Obje grupe su imale priliku na radionicama pogledati video, prilagođen njihovom uzrastu na temu kulturološka različitost i dijalog. Radionice su održane u Omladinskom centru Brčko distrikta BiH.

Za jul se planira nastavak svih redovnih radionica Omladinske organizacije Svitac.





H.O. MUSLIMANSKO DOBROTVORNO DRUŠTVO – MERHAMED DOBOJ

Ul. Kralja Aleksandra 17, 74000 Dobož
Tel./fax: +387 53 226 886
E-mail: merhamet.doboj@cutuk.net
FB: www.facebook.com/Merhamet-Doboj

Osim stalnih aktivnosti koje podrazumijevaju: evidentiranje članarine, pomoći korisnicima "Merhameta" (štampaње molbi, žalbi, raznih dopisa, fotokopiranje), pružanje informacija, raspodjela humanitarne pomoći, izrada projekata i prisustvo seminarima, okruglim stolovima i drugim sesijama, u junu smo imali sljedeće aktivnosti:

11. juna "Merhamet" Dobož je izvršio raspodjelu 260 ramazanskih paketa. Paketi su podijeljeni za Bajram u naseljima Gornji Pridjel, Ševarlije, Grapska kao i grad Dobož. Pakete je doniralo udruženje "Merhamet" iz Švedske.



12. juna udruženje "Merhamet-" je prisustvovalo nastavku radionice u okviru projekta "Smanjivanje zdravstvenih rizika u BiH"



25.juna udruženju „Merhamet“ je uručena novčana nagrada na dan grada Doboja. Nagradu je primila predsjednica udruženja Avdić Fikreta. Sa obzirom da je nagrada od velikog značaja za održivost udruženja „Merhamet“ se ovom prilikom zahvaljuje načelniku Doboja Obrenu Petroviću.





PRONI Centar za omladinski razvoj

Ul. Mehmedagića 24, 76100 Brčko distrikt BiH
Tel./Fax: +387 49 217 695
E-mail: pronibrcko@teol.net
www.pronibrcko.ba

Radionica „Zaštitnici ljudskih prava“

Predstavnici PRONI Centra 28. juna učestvovali su na radionici na temu "Zaštitnici ljudskih prava" organizovanoj od strane OSCE – The Organization for Security and Co-operation in Europe.

Svrha radionice bila je da označi početak dijaloga koji bi imao za cilj širi angažman lokalne zajednice u zaštiti ljudskih prava, sa prvenstvenim osvrtom na slobodu mirnog okupljanja i uloge civilnog društva u zaštiti ljudskih prava. Osim toga, cilj radionice bio je i unapređenje dijaloga i saradnje između predstavnika civilnog društva, kako bi se uspostavili temelji za njihovo partnerstvo i zajedničko djelovanje u pogledu zaštite ljudskih prava.

Mreža za budžetsku odgovornost

20. juna PRONI Centar je učestvovao na završnom događaju "Mreže za budžetsku odgovornost", u okviru Programa održivosti civilnog društva u BiH (CSSP).

Održana konferencija „Mladi protiv nasilnog ekstremizma“

Ključni identitet za borbu protiv ekstremizma trebao bi biti identitet građanina/gradžanstva, saopćio je na konferenciji u Sarajevu Dion van der Berg iz holandske mirovne organizacije PAX, uoči održavanja konferencije pod nazivom "Mladi protiv nasilnog ekstremizma".

Radi se o konferenciji koju su organizirali Ministarstvo civilnih poslova Bosne i Hercegovine i PRONI Centar za omladinski razvoj Brčko, s fokusom na učešće mladih u aktivnostima orijentiranim na sprečavanje nasilnog ekstremizma. Konferencija je održana 12.06.2018.



Konferencija je partnerski projekt PRONI Centra za omladinski razvoj Brčko, Omladinskog resursnog centra Tuzla i mirovne organizacije PAX iz Holandije, koji se realizira uz podršku Ambasade Kraljevine Holandije u BiH putem MATRA programa.

Dion van der Berg je također dodao da je neophodan intenzivniji angažman u borbi protiv nasilnog ekstremizma s obzirom na pojavu da mlade na globalnom planu sve više privlače ekstremne ideologije.

Ocijenio je da se radi o prijetnji protiv koje se, dugoročno posmatrano, najefikasnije može boriti putem daljnje demokratizacije društva, odnosno promoviranjem temeljnih demokratskih vrijednosti i ljudskih prava.

Komentirajući novinarski upit u vezi s mladima i ekstremnim ideologijama, Van der Berg je podcrtao značaj angažmana i borbe protiv podjela među ljudima i narodima, precizirajući da je pri tome ključno

pitanje to što, zapravo, čini identitet svakog pojedinca, odnosno “je li mi kao građani postupamo u skladu sa zakonom...”.

Na različite aspekte borbe protiv nasilnog ekstremizma ukazali su Jasmin Jašarević i Dejan Rađen iz PRONI Centra za omladinski razvoj Brčko, kao i Fatima Krivošija iz Ambasade Kraljevine Holandije u Bosni i Hercegovini, istaknuvši značaj zajedničkog angažiranja svih raspoloživih resursa – domaćih i međunarodnih institucija, nevladinih organizacija, medija na planu suzbijanja pojava nasilja, ekstremizma i radikalizma.

Fokus je, kako su kazali, na analizi i načinima eliminiranja govora mržnje i nasilja koje se manifestira putem društvenih mreža, a polazište za debatu jeste istraživanje provedeno u BiH na uzorku od 551 mladom ispitaniku iz 60 općina, koje svjedoči o visokom procentu onih koji su bili žrtve nasilja ili govora mržnje na internetu, a, nerijetko, i o prisustvu društveno neprihvatljivih uvjerenja.

Konstatirano je, između ostalog, da mladi predstavljaju najosjetljiviju populaciju te da je njihova inkluzija neophodna za stvaranje pozitivnih narativa, kao i uspješnih mjera za borbu protiv radikalizacije, uključujući i potrebu za promoviranje uvjerljivih alternativa ekstremnom nasilju.

Neki od ciljeva konferencije su – informiranje mladih iz BiH o važnosti suzbijanja govora mržnje na internetu, širenje svijesti o značaju upoznavanja, saradnje i međusobnog uvažavanja te pomoć mladima u multietničkim sredinama, kao i povezivanje mladih aktivista za ljudska prava da mapiraju govor mržnje na internetu i razviju instrumente s konstruktivnim odgovorima.

Opći cilj projekta je pružiti podršku i povećati učešće mladih u aktivnostima koje imaju za cilj sprečavanje nasilnog ekstremizma tako što će dati prioritet značajnim mehanizmima angažiranja na lokalnom i nacionalnom nivou, kako je navedeno u rezolucijama UN 2178 i 2250, te pružiti fizički, socijalno i emocionalno sigurno i poticajno okruženje za učešće mladih u sprječavanju nasilnog ekstremizma građanina/gradžanstva, saopćio je Van der Berg.

Mladi glumci iz Brčkog izveli predstavu „Više od hiljadu riječi“

09. juna je u Domu kulture u Brčkom održana premijera predstave „Više od hiljadu riječi“, nastale kao dio projekta „Ispeci pa reci“, implementiranog od strane PRONI Centra za omladinski razvoj, uz finansijsku podršku fondacije Schüler Helfen Leben. Projekat okuplja 20 mladih od 15 do 30 godina, a bavi se govorom mržnje primijenjujući scenske umjetnosti. Sam projekat traje od 15.12.2017. do 30.06.2018. godine, a aktivan rad na kreiranju ove predstave započeo je u januaru.

Predstavu koja ukazuje na izvore i prisutnost navedenog problema kreiralo je 20 mladih iz Brčkog, uz stručnu pomoć rediteljke Sandre Ikanović-Jovičić. Pored glume učesnici projekta imali su priliku da se okušaju u oblasti fotografije, PR-a, kostimografije i scenografije.

“Drago mi je da smo uspjeli realizovati ovaj projekat, jer se PRONI Centar već 20 godina bavi omladinskim radom, a tehnike tetatra u radu su moćan alat i daju nevjerovatne rezultate ako ih usmjerimo na pravi način”, rekla je koordinatorica projekta i uposlenica PRONI Centra Adina Halilović, u izjavi za Otsak.ba.

Nakon premijere održan je okrugli sto sa učesnicima projekta i predstavnicima medija.

Mlada ekipa, uz koordinatoricu i rediteljku, podijelila je svoje utiske rada na predstavi i svoja iskustva o navedenoj temi. Naglasili su značaj bavljenja govorom mržnje i njegovo prisustvo u svakodnevnom životu mladih ljudi.

“Ovo je jedan od rijetkih a možda i jedini projekat ove vrste u Brčkom nakon dugo vremena. Pokazao nam je da imamo kvalitetne mlade ljude i, ukoliko im damo prostor i vremena da se pokažu, naprave nevjerovatne rezultate. Govor mržnje je jako široka tema i jedna od onih kojom se treba baviti iznova i iznova, ali za ovu predstavu pažnju smo usmjerili na internet jer je to tema koja je aktuelna i nešto s čim se mladi ljudi danas suočavaju svaki dan. Svi likovi i priče koje čine predstavu su inspirirani stvarnim događajima koje su ovi ljudi proživjeli ili poznaju osobu koja je to proživjela. Željeli smo realizovati projekat koji će promovisati lokalni aktivizam i potaknuti mlade u Brčkom da se kroz aktivizam i volontiranje bave temama koje ih se suštinski tiču, istražuju i pronalaze rješenja za iste, a opet u isto vrijeme uče, izgrađuju svoju ličnost i postaju prepoznatljivi kao aktivni članovi zajednice i odgovorni lideri lokalne zajednice”, rekla je koordinatorica za kraj razgovora.



Pored premijere u Brčkom učesnici su imali priliku predstavu izvesti i u četiri mjesne zajednice Brčko distrikta BiH, 10.06. u Rašljanima i Vučilovcu, te u četvrtak, 14.06. u Grčici i Gornjem Zoviku. Nakon svake predstave, je organizovan okrugli sto tokom kojeg su se protagonisti družili sa publikom i bili u mogućnosti da razmijene mišljenja o problemu, učešću u projektu i procesu kreiranja predstave.



INFORMACIJE / DONATORI / POZIVI

Javni poziv mladima za dostavu planova pokretanja vlastitog biznisa koje finansirala Općina Centar Sarajevo

U cilju poticanja zapošljavanja mladih Općina Centar Sarajevo raspisala je Javni poziv za finansiranje i sufinansiranje najboljih poslovnih projekata sredstvima općinskog budžeta namijenjenim razvoju poduzetništva i zapošljavanju mladih.

Javni poziv je objavljen u ponedjeljak, 18. juna 2018. godine u listu "Dnevni avaz" i na općinskoj web stranici: www.centar.ba i ostaje otvoren 60 dana, odnosno do 16. augusta 2018. godine.

Pravo na bespovratna sredstva iz budžeta Općine Centar za pokretanje i razvoj vlastitog biznisa, koja mogu iznositi do 15.000 KM po poslovnom planu, imaju stanovnici općine Centar do 35 godina starosti koji se nalaze na evidenciji nezaposlenih Zavoda za zapošljavanje Kantona Sarajevo. U zadanom roku potrebno je da mladi aplikanti dostave poslovni plan vlastitog biznisa. Ocjenu poslovnih planova koje će mladi imati obavezu prezentirati i postupak dodjele bespovratnih sredstava, shodno utvrđenim kriterijima, provodi komisija koju imenuje općinski načelnik.

Tekst javnog poziva, kao i obrazac izjave i poslovnog plana dostupni su na općinskoj web stranici www.centar.ba (Konkursi i oglasi). Pisane prijave podnose se Komisiji za provođenje postupka dodjele sredstava za poticaj zapošljavanja mladih Općine Centar putem Službe za finansije i lokalno ekonomski razvoj, Mis Irbina 1.

U ovogodišnjem budžetu Općine Centar za tu namjenu planirano je 200.000 KM.

Grad Tuzla: Objavljen poziv za dodjelu sredstava neprofitnim organizacijama

Služba za ekonomski razvoj i društvene djelatnosti Grada Tuzla, danas 28.06.2018.godine, objavila je Javni poziv za dodjelu finansijskih sredstava iz Budžeta Grada Tuzla neprofitnim organizacijama.

Predmet ovog Javnog poziva je dodjela finansijskih sredstava iz Budžeta Grada Tuzla za podršku projekata neprofitnih organizacija koji se realizuju u prioritetnim oblastima određenim važećim strateškim dokumentima Grada Tuzla.

Dodjela finansijskih sredstava se vrši prema usvojenoj LOD metodologiji, a kompletan tekst oglasa pogledajte **OVDJE**.

Nizozemska preduzetnička agencija: Poziv za prijave 2018-2020 – „Creative Twinning Grant“ Program

Rok: 31. august 2018. godine

Da li je vaša kompanija ili NVO kulturna organizacija? Da li su vaše kulturne aktivnosti usmjerene na doprinos socijalnoj koheziji u zemljama koje se graniče sa Evropskom unijom? Ako je odgovor da, onda se prijavi za „Creative Twinning Grant“ program 2018-2020.

Nizozemska preduzetnička agencija (RVO.nl) traži aplikacije za „Creative Twinning Grant“ program 2018-2020, shemu subvencija koja pomaže u razvoju kulturnih aktivnosti u zemljama koje graniče sa EU. Ove aktivnosti jačaju međusobne veze, povećavaju povjerenje i unapređuju komunikaciju između Holandije i

uključenih zemalja u program. Projekti imaju za cilj da doprinesu inkluzivnosti za određene omladinske grupe.

Kulturne slobode u graničnim zemljama EU su pod velikim pritiskom. Ova situacija kompromituje odnos između Evropske unije i njenih susjeda i rezultira izolacijom umjetnika ili drugih kreativnih osoba. Učestvovanje u različitim kulturnim aktivnostima također postaje sve teže u ovim zemljama, posebno kada imaju veliki broj izbjeglica i migranata. Otvoreni dijalog o kulturnim razlikama ponekad zamjenjuje kulturni sukob ili čak i namjerno kulturno uništenje. "Creative Twinning" je reaktivni projekat Twinning-a koji doprinosi:

- snažnijem lokalnom kulturnom sektoru koji može doprinijeti socijalnim inovacijama;
- većem učešću mladih u kulturnim dešavanjima;
- sigurnijem, održivijem urbanom životnom okruženju;
- održivom očuvanju lokalnog kulturnog naslijeđa.

Informacije o budžetu

Svaki projekat može podnijeti zahtjev za bespovratna sredstva od 600.000 € do 1.400.000 €. 4 do 8 projekata dobit će bespovratna sredstva u sklopu programa „Creative Twinning“.

Kriteriji

- Mladi ljudi u dobi između 15 i 24 godine u zemljama koje graniče s EU su ciljana skupina tih kulturnih aktivnosti koje se odnose na vizualne umjetnosti, scensku umjetnost, film i književnost. Također se mogu prijaviti projekti koji uključuju multidisciplinarnе oblike umjetnosti, kulturno naslijeđe i dizajnerske sektore (arhitektura, kreativni dizajn i novi mediji).
- Ključna komponenta Twinning projekata je saradnja, budući da se ova shema fokusira na povećanje povjerenja i poboljšanje komunikacije između Nizozemske i susjeda EU. Kao rezultat toga, organizacija mora biti angažovana u savez kako bi bila kvalificirana za subvenciju za „Creative Twinning“ projekte.
- "Creative Twinning" je otvoren za projekte u zemljama koje graniče s Europskom unijom. Te zemlje moraju ispunjavati slijedeće uslove:
 - OECD-DAC ih nije klasifikovao kao najmanje razvijene zemlje.
 - Služi ih operativna nizozemska ambasada.
 - Izvan su Europskog ekonomskog područja.
 - Liban, Mali i Palestina su isključeni kao ciljne zemlje za ovaj program.

Kako se prijaviti

Aplikanti se mogu prijaviti online preko date web adrese.

Za više informacija posjetite [Creative Twinning](#).

Izvor: <https://www2.fundsforngos.org/arts-and-culture/netherlands-enterprise-agency-seeking-applications-for-2018-2020-creative-twinning-grant-program/>

Poziv za 35. Internacionalni festival Sarajevo

„Sarajevska zima 2019“

BUKA I BIJES – NOISE AND FURY
07.02-21.03.2019.

Program Internacionalnog festivala "Sarajevska zima" se sastoji od pozorišnih predstava, koncerata, filmova, likovnih umjetnosti Izložbi, panel diskusija, književnih večeri, arhitekture, videa, programa predstavljanja kulturne baštine i dječjih programa. Programi će biti predstavljeni i u narednom izdanju Festivala.

BUKA i BIVLES

SZF2019

Programi Festivala održavat će se u pozorištima, galerijama, muzejima i koncertnim dvoranama u gradu i na olimpijskim planinama. Festival ima čast pozvati Vas da svoj projekt predstavite kao jedan od programa za sljedeće izdanje festival "Sarajevska zima 2019".

Aplikacije za učešće možete preuzeti na ovom [linku](#).

Rok za dostavu aplikacija je 15.11.2018.g.

Više informacija ćete pronaći [ovdje](#) ili [ovdje](#).

Program kulturnih grantova ambasade SAD u Sarajevu

Cilj Programa kulturnih grantova Ambasade SAD je podrška programima koji dijele bogatstvo i raznolikost američke kulture sa bosanskom javnošću, te promiču međusobno razumijevanje i kulturni dijalog između Sjedinjenih Američkih Država i Bosne i Hercegovine. Grantovi se obično kreću između 1.000 i 15.000 dolara, a dodjeljuju se neprofitnim organizacijama i ustanovama za umjetničke i kulturne predstave, gostujuće govornike/reditelje/izvođače, prava na američka djela, izložbe, radionice, itd., koji unapređuju ciljeve programa. Prijedlozi projekata se primaju stalno, a potrebno je da budu dostavljeni 3-6 mjeseci prije planiranog događaja ili aktivnosti.

Što tražimo?

- Programska komponenta koja pomaže u izgradnji i poboljšanju odnosa između Bosne i Hercegovine i SAD-a i/ili uvodi novi element američke kulture u Bosnu i Hercegovinu.
- Projekat sa jakim umjetničkim zaslugama.
- Odgojna komponenta, kao što je radionica ili majstorska klasa od strane gostujućeg umjetnika.
- Projekti koji imaju korist za široku grupu ljudi ili imaju plan za prošire rezultate u javnosti.

Vaš će se prijedlog vrednovati i po sljedećem:

- usklađenost sa smjernicama prijedloga i uključivanje obaveznih komponenti,
- konkretan i logičan budžet, i
- kapacitet aplikanta za implementaciju projekta.

Više informacija na link <https://ba.usembassy.gov/education-culture/grant-opportunities/cultural-grants-program/>



Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

Adrese za slanje vaših informacija za mjesečni bilten:
Omladinski resursni centar Tuzla
Hadži Bakirbega Tuzlića 1
75000 Tuzla
tel/fax: 035 258 077
e-mail: orcuzla@bih.net.ba
hcatuzla@bih.net.ba

Mjesečni bilten uređuje
Omladinski resursni centar -
ORC Tuzla

Bilten uređuje: **Amila Selimbašić**
Prevod Biltena na engleski: **Emir Karamujić**

WEB stranica Mreže:
www.omladina-bih.net

Mejling lista Mreže:
posta@omladina-bih.net

Webmaster:
emir.delalic@gmail.com